

四庫全書

集部

欽定四庫全書

祠部集卷十七

宋 強至 撰

狀

賀韓魏公生日狀

素商肇序元精萃在於金行大昴儲祥上相出符於寶
歷維時載誕與國同休恭以判府司徒侍中道濟王塗
望高宰路功名自著而避遠無跡德爵極隆而持循以
謙一已安行而有餘衆心仰慕之不足卷三朝之鉅業

久退守於宮符撫千里之環封復懇紆於鄉里門弧戒
旦鼎食增榮宜壽而臧合萬辭而祝頌若富與貴永百
福之崇高某適倅計庭正遙恩館馳懽誠而第劇就慶
列以無從北望台光卑情無任激切瞻禱之至

樞密富相公加戶部尚書狀

伏審誕敷內命具告外廷進長地官增崇台序伏惟慶
慰恭以樞密相公器包民極勲濟王塗洞安危之大機
更文武之二柄宰庭論道尚存鄭侯之舊規樞幄本兵

不聞敵騎之南牧兩朝感會一德將明邁繼聖之重光
采建儲之前議特加峻秩示獎元勲雖懇列讓封隱廟
謀而弗有而勉從制冊激朝論以逾高

上富資政狀

向紆守綏邈遠台符當淮州囂冗之衝積官簿沉迷之
慮馳心材館徒爾增勞奏記鈴齋缺然不講伏惟布黃
堂之政事萃泰宇之福禧恭以某官道簡上心名重天
下高文大冊蚤中於賢科要職美官獨揚於聖世將命

絕域能尊大於本朝避寵鴻樞益光華于全德進陞祕
殿出領巨邦綏一州之氓惜利澤之未廣調大鈞之化
庶中外之咸依行奉詔書入居鼎席

樞密張太尉加吏部侍郎狀

伏審顯對冊書增崇命數優國老之舊德進天官之亞
卿邸報初聞朝論胥慶恭以樞密太尉天民先覺王佐
偉才抱忠諒之一心出誠明之正性參鼎司而調萬化
清風尚存坐宥省以論五兵白首逾厲適報受遺之德

遽疏進秩之恩垂光中階登貳冢宰鴻樞之秘想妙畧
之咸依赤松之遊追先芬而未可永言企躍曷盡敷云

叅政趙侍郎加吏部侍郎狀

伏審帝制發中天官登貳挺陶所暨喜躍惟鈞恭以叅
政侍郎道備將明德含惇大忠言坐斷乎國論文體追
還於古風自結主知歷紓賢業拜先皇於卧內親受遺
言出嗣聖之宸衷特崇舊德加峻中臺之貴秩益光近
輔之榮班某總計朔陞馳誠翹館顧業官之有守思展

慶以無從

代賀向少卿狀

伏審宸檢疏恩月卿進秩暉映之下躍抃兼常恭以某
官亮節在廷懿文表世榮寵紳綏之貴慶鐘圭衮之餘
領通漕之事權瞻大邦之用度芝函錫命棘位登賢心
計無垠聊屈外臺之寄聰聞甚熟佇觀迅詔之來俛惟
冗微鎮卜棲倚

代賀李參政狀

伏審帝詔登賢宰庭進序埏鎔所暨懽躍惟鈞恭以某
官上天元精清廟偉器行出世表文為人師識度宏深
夙稱大臣之業忠誼肅正自結真主之知遽違京邑之
雄徑宅廟堂之貴圖講治安之策今也其時樹立太平
之基決於匪日九州四海萬口一辭某適貳守符遯遙
台屏雖聞風而增忤惕馳賀以無階

代賀待制諫議狀

伏審入覲宸旒峻躋諫闥側聞新命竊忤丹悰恭以某

官莊重自居直清不倚早逢文雅之會優踐庶良之科
回翔顯塗暉映當世早居侍從之職屈領事為之權掌
通漕之司方凝於茂績奏甘泉之計密簡於上衷遽兼
內閣之華驟置七人之列金穀之委聊慎於才難鈞衡
之崇佇膺於冊籍即圖趨伏併述忻翹

代賀梁副樞改給事狀

一違牆宇久偃邦鄉有簿領之櫻懷習成幄放顧音函
之布問坐致濶稀茲承疏渥嚴宸登賢華序矧叨暉庇

實倍忻愉恭以某官莊重自居直清不倚逢辰熙穆筮
仕光亨飛縷金馬之廷早揚仙貫視草玉堂之署密暢
宸猷日親奉於威顏位益隆於體貌鴻樞之府叅掌於
繁機責瑣之門驟光於寵拜矧時所傾屬上方倚毗咫
尺台衡聿攄真相之業仁壽億姓以畢大臣之能

代賀歐陽龍圖知府狀

伏審光奉制書就移泊屏伏惟欣慰恭以某官際天蘊
識名世標才允極將明之資以基太平之業屈司宮鑰

鬱四海巖巖之瞻行被宸綬宅上台兩兩之曜

代賀文相公狀

伏審恩章均霈冊命發中慶與國均榮動物聽竊以昊天著象酌氣者機衡之司皇國設官賦政者喉舌之任審是要選歸於宗工恭以某官上台元精清廟偉器歷二府之重委踐三槐之絕班晉公底淮右之平入持宰柄山甫補周家之闕遠踵賢規大屬股肱之良益隆體貌之地某職貳方郡跡遙廟堂馳賀無階企悚良極

代賀發運待制狀

右某伏以寶典履長盛儀亞歲義易紀某來復魯史載
夫望書恭以某官才貫幾深德涵剛實外臺重委誠曰
藉才之司內閣通聯決非久次之地順迎令序誕擁龐
褫某適守賤司不獲躬詣堦墀稱慶卑情無任瞻頌激
切悚惶之至

代賀運使張刑部狀

伏審寵承鴻渥榮改清郎伏惟慶慰恭以某官業履蹈

中才猷彪外渙更重委率著能名括地賦於列城實關
心計陟秋官之要秩茲副恩章俛惟下察方備屬吏側
聆甄擢倍萬忻愉

代賀許發運賜出身狀

伏審光被詔音榮升科等側聞異數陰忤丹悰竊以國
家圖講聖治之端追捕時文之弊以有司持尺寸之度
豈盡得人而賢者具經濟之資或艱中第爰頒不次之
命以擢非常之才恭以某官識洞深幾學探精蘊雄文

大筆自結於主知細札溫書特躋於賢選天下知勸朝
論加優燕賀良深葵忱曷罄

代賀麗昭文狀

伏審就膺制冊陞冠宰庭成命既行有生同慶恭以某
官高文經世鉅業代天道誼致君忠諒行已間綏邊聞
旋貳樞廷浸隆萬乘之知叅斷三公之論底邦猷於甚
盛密簡中宸隱廟略而勿居一歸上袞遽正元台之位
以彰真相之才廟堂之號得賢莫先今日區夏之觀至

治計在匪朝某職預漕臺迹遙政府亞紳綏之懽蹈邈
矣無階託鈞治之誕鎔幸而有地

代賀陳雜端狀

伏審榮改諫聯就登憲職伏惟慶慰竊以臺選之妙官
材實艱言朝廷是非糾臣僚過失其膺慎簡允屬宗賢
恭以某官行潔性醇德宏業鉅高文大冊早中於賢科
美職要官進揚於聖世才為時而傑出道遇主而盛行
間分九五之憂往撫東南之地全安罷俗宣諭至仁甄

擢俊良抑黜姦懦迫使車之還止果宸扆之嘉焉開英
袞之便塗濟繡衣之上笏彌逢庶政之闕今也其時樹
立太平之基決於匪日俛惟冗瑣舊辱獎憐新命傳聞
寸衷竊忤訖恩成而有地從賀列以無階

又

祗服恩華進更臺選伏惟慶慰竊以國家深講至治並
登偉人風議所關憲職為最糾朝行之過失正色不回
論邦體之是非危辭無避其膺妙簡允屬宗工恭以某

官術業宏長才猷膚敏見不忠於君者直哉必言苟可
利於國乎行且弗顧嚮領嚴宸之命盡觀列郡之風陞
賢黜姦扶弱抑蠹迨旋崇旆入覲遽疏宣詔意而甚明
果上心之稱允繡衣劇序聊示於徽章英袞絕班行光
於寵拜

代賀陳相公狀

伏審寵建使旌榮兼相印仍躋祕殿復鎮舊藩伏惟慶
慰恭惟某官社稷宗臣山河間氣秉直道以結人主挾

重計以尊朝廷鼎宅昂司首膺晉錫裁黜貴倖振拔滯
淹窒塞濫源啓闢治路底邦猷於甚盛密簡嚴宸避廟
畧而弗居懇辭上衮部守符而均佚露公冕以觀風卷
康濟之大而就一州遂蕃宣之樂而鬱四海帝心久注
恩數推優謂體貌舊臣宜帶宰臣之序欲節制諸郡因
加將鉞之雄禮意甚隆輿言弗愜一相處外勞周伯之
來歸萬民具瞻望晉公之再入行膺徽冊還陟元台曾
是疎頑嘗依埏造頑金待器更期大冶之開廣厦既成

敢效翔飛之賀

代賀發運鄧郎中狀

伏審祇奉茂恩出司通漕側聞成命竊抃寸襟恭以某
官術業宏長智謀膚敏郎垣應宿蚤躋位著之嚴使節
宣風存領事權之劇旋聞名於法坐亟佐職於財闡眷
言淮海之輸實備邦家之計董外臺之轉給宜得周才
被溫詔之褒陞允資碩畫俛惟屬部將庇末暉欣幸交
深名言非悉

又

伏審祇奉恩函總司利柄竊以中都之費率繫通漕之
供乃簡周才以分重寄恭惟某官中和迪哲亮直秉彝
謹漕節之輸將浚登最狀叅財閹之經度久試豐功遽
為總括之知却領東南之計俛惟懦品嘗庇末光復
依使旆之嚴不失君軒之舊永言慶忭倍萬等倫

又

伏審進膺宸誥出總使臺將托未暉預深竊抃恭以

某官行推高爽道具醇全邁復旦之聖期踐列星之
郎位備紆賢蘊自結主知存持漕節之嚴入預計廷之
劇網繆利柄歷詳金穀之原蒙被朝僉都領江淮之
運物論皆允邦須所依俛惟下寮行備屬吏永言欣
幸曷寃名言

代賀施龍圖狀

伏審北轅按部中路改恩罷總漕臺往司宮鑰伏惟
慶慰恭以某官器包民極勲濟王塗親對休辰海揚旌仕

領邊藩之劇部叅財省之偉謀風績並凝褒章增峻
陞延閣之祕益注嚴宸之懷董大計於東南久煩經畫
副具瞻於中外差緩陞庸遽被溫書暫班寬詔俛惟屬
吏夙荷恩私歡戀并懷指云非論

代賀錢侍讀移青州狀

伏審光膺細札移殿巨藩伏惟慶慰恭以某官方格淳
修器識宏遠高文大冊早決於世科至論昌言有裨於
國體進直禁扃之祕旋陪乙夜之觀禮遇益隆地望絕

擬輟居嚴署出守南麾已躋雅俗之安靡俟更書之滿
朝端上袞差緩於登庸京左數邦聊繫於鎮撫卽光冊
拜大副巖瞻

代沈主客賀文侍中知永興狀

進膺冊命出布政條伏惟慶慰恭以某官王佐偉才天
民先覺濟極功於天下暢鉅業於朝端蚤躋台序之嚴
旋宅宰司之冠冕闕儀之未講墜典畢修畫常憲於可
行成規永賴去終禮制起應詔音建淮海之高牙鎮闕

河之巨屏式是遠畧穩如長城繫樽俎之前籌寬朝廷
之西顧外蕃王室暫勞申伯之行歸秉國鈞再俟晉公
之入伏望上為宗社精調燕興

代賀知府李密學狀

伏審祇奉制音就觀幾政側聞新命竊抃寸襟恭以某
官經世偉才薦紳碩望由妙年而取上第不累日而都
要官亟自禁林之遊徑登樞府之直時論歸重上知愈
明京邑四方之表儀翕騰於尹治率廷百辟之師帥當

被於朝僉咫尺聰聞旦夕冊拜未遑馳慶先辱占書媿
喜并深名言非諭

代賀安撫太保狀

伏審肅膺朝命出諭上仁拜德有階普天共幸恭以某
官識度沈遠機神迅清名簡萬乘之心才兼數器之任
帝念東南之郡民罹水旱之年分使臣之光華奉承溫
詔布天子之惠愛撫慰羣元某適守陋藩行瞻嚴旆永
言企曷究文陳

代賀青州文相公狀

伏審就膺細札移鎮巨邦凡出埏陶惟均抃躍恭以某
官山河間氣社稷宗臣道遇主而盛行位因功而數易
運神機於樞幄纔服華章叅正議於鼎司遽更徽冊方
將緝熙當世之綽舒暢蒼生之心會狂敵之悖常嬰孤
域而假息獨形忠憤請殄姦妖廟算畧施冠巢隨破晉
公登用最高平蔡之勲傳說贊襄休有弼商之策追合
宮之濶典一旦舉行詔列郡之禮闈同時開設少見大

臣之效弗殫真相之才露冠冕以觀風剖守符而均佚
朝端上衮矧久鬱於民瞻京左數邦復暫勞於君重行
祇明命還宅元台曾是孤生嘗叨清舉請假書林之職
俾兼漕節之權雖寢曲恩如沾大賜自違鈞屏尋總計
臺第切歡誠阻從賀列

代賀宋內翰移鎮狀

伏審祇奉明綬移專巨鎮伏惟慶慰恭以某官民靈先
覺王佐偉才道簡上心名重天下陞華延閣蚤潤色於

宸篇翔步禁局久發揮於內命旋陪乙夜之覽允極丁
辰之光固宜陟降王塗優游公路遽出觀於藩政已外
鬱於巖瞻復被恩函改臨邊閫眷惟中國之望恃若長
城之堅綏懷遠人節制諸郡講兵命之利疾攷風俗之
便宜行聞敵騎悚威固無南牧之意朝廷倚重不復西
顧之憂紀績王常調元台昂其適司通漕方庇末光亟
聞新命之行徒劇懦衷之戀葵傾倍切燕賀無階

代賀制置端公狀

伏審拜嘉朝右進秩臺端凡被挺鎔惟均慶慰竊以國家盛重中都之計率繫通漕之才謂金穀之繁尤國之要務而歲月既久茲見於成功將大升庸之階故先雄劇序恭以某官性與道會器隨用周遽冕對敷方嘉於碩畫法冠直指遽踐乎榮班思出主知事光物論矧繡衣之上笏即英袞之便塗時議皆然愚言非佞俛惟孱薄最辱獎憐新命傳聞喜踰於他等賤司嬰繫跡阻於前趨企悚攸深名言匪悉

冬至賀錢內翰狀

寶典履長盛儀亞歲義易紀其來復魯史重夫望書恭
以某官業術崇高智謨光大厭禁林之久侍聊以觀風
暢台袞之偉謀行聞祇召順迎令序誕擁龐褫某守在
小邦跡遙巨屏祝南山而為壽適阻前趨託鱣幅以貢
音曷殫下懇

代賀張刑部得替狀

伏審顯膺名節榮解利權行乘卓馬之朝入覲蒼龍之

闕良階柄任增忤禁悚恭以某官風業宏長才謀膚郤
自領漕臺之劇益為辰辰之知給食京師已報輸將之
最敷休軒陛佇嘉經畫之明亟列近嚴庶符頌願

代賀省副端公充待制狀

伏審祇奉恩函榮躋禁職側聞顯命竊忤丹悚恭以某
官識宇宏通才謨高亮剋休辰而逢吉揚臚仕以開榮
蚤為聰哲之知出總東南之漕剋去積弊樹成新規力
董輸將矧勤勞於十稔訖繫幹濟已瞻足於中都固風

績之茂馬果上心之嘉乃適因奏計之便遽被疇庸之
章對命嚴宸陞華延閣訂茲慎選誠曰當賢籠金穀於
百城暫還舊物秉機衡於二府佇拜明恩

代賀張待制知揚州狀

伏審解麾吳服移鎮淮壩審即便時已開尊府伏惟慶
慰恭以某官秉心峭介懋德優宏素履清風最高乎時
論美官要職歷踐以班榮蚤居延閣之華累典名城之
重薊州舊俗方結於去思蕪城故知尚嗟於來暮適兩

輜之稅駕班寬詔以觀風靡俟政成行光柄任

代賀發運端公授省副狀

伏審顯承恩詔進貳財聞成命已行寸襟竊忤恭以某
官才兼數器名重當時弗援強近之知自結聖神之眷
兼臺綱之美秩總漕節之劇司給食京師矧風猷之久
懋敷休軒陞會歲課之告成亟嘉經畫之明旋被褒陞
之渥亞計廷之要職方倚國才暢台路之密謀行光寵
命俛惟疏冗最辱獎題適領守符阻從賀列

代賀運判賜章服狀

伏審被詔發中拜嘉不次伏惟慶慰恭以某官鍾氣間
傑為時聞人名動薦紳道結當辰高文大筆自取於要
官鉅業周才遽當於顯用乘江淮之歲歉加金穀之數
藪力暢偉謀助成大計果申慶典以錄豐功將興歎於
能臣乃疏榮於品服主恩至當物議皆然某適貳守符
阻陪賀列瞻言使旆曷諭愚悰

代賀二漕改官狀

伏審歲課告成星垣增峻公庥所暨私牀惟均恭以某
官名重薦紳才兼數器被邦家之選遇蚤暢賢謨董山
海之輸將存登最狀旋承鴻渥進改清郎矧繫碩畫之
明更聽茂恩之擢屬官居之有守趨慶列以無階企悚
交深文陳非論

代賀副樞給事狀

伏審顯承明制參掌繁機成命既行有生胥慶恭以某
官智謀光大業履崇高挺金石之純誠抱廟堂之偉器

忠言坐斷乎國論亮節素邀乎主知間倚重於翰垣將
往綏於邊閫邁谿首之崛強憑巖險以繹駭議舉靈誅
僉推碩畫方便旌之就道俄宸詔之命還果廟算之萬
全破寇巢於一舉洎聞大凱因荅豐功拜嘉青瑣之門
貳職鴻樞之府圖講治安之策今也其時樹立太平之
基決於匪日佇更徽冊進陟元台副函夏之具瞻畢大
臣之能事俯惟愚品久託鈞庥散木弗材嘗荷先容之
賜頑金能躍更聞大治之開第劇歡誠阻趨賀列

代賀何龍圖移慶州狀

伏審茂對宸綰就更藩聞受知有素抃躍惟深恭以某
官才為世生道先民覺蚤署含元之上第旋直承明之
秘廬當宸以忠誼知名薦紳以文章矜式俄持太史之
筆久列侍臣之班益峻恩章逾陞禁列眷惟治屏俯控
西陲宜得國楨以綏邊俗用恩威之二道專節制於一
方隱若長城暫繫於坐鎮肅然中詔行趣於登庸某適
貳麾符阻趨旌榮遙瞻使節曷罄愚誠

賀得贊都監王殿直狀

伏審告成美課入覲嚴宸驟奪公庥第增愚戀恭以某
官清端不倚沈毅有謀董師律於方州適茲滿歲佐戎
旃於邊閫其在匪朝倍慎寢興以酬光渥

賀田戶曹移令狀

伏審顯奉宸緡就紆縣綬伏惟懽慰恭以某官器資夷
遠品格端嚴決科妙年掾郡更歲薦書交上劇論於美
材褒詔亟頒優分於便邑未遑修慶先辱占音感并并

深名言非悉

賀金華著作狀

審即便時已臨劇邑方棲餘庇竊忝丹棕恭以某官學
有本原性函剛實叅華金馬茲漸於清塗分寄銅章遂
攄於素蘊宿官所限稱慶莫前瞻抃交深名言非論

賀文潞公狀

伏審肅即便時肇臨宥省神機所總福祚具蕃恭以某
官涵德淳深秉燁光大協風雲之盛會揭日月之貴名

早冠序以宰塗汜致平於王路叱煩遠畧往殿劇藩建
淮海之高牙方開尊府挹河汾之間氣趣覲清光夙推
英袞之謀首付鴻樞之柄方隅無事暫賴留侯之運籌
廊廟有聲復歸蕭相之畫一邇熙朝之偉績收高世之
極功鐘鼎所銘邦家之耀俛惟衰晚訖託埏鎔第內激
於懽誠阻前陪於慶列

代趙待制賀昭文相公加左僕射狀

伏審誕膺徽冊祇服華章進陞右相之尊增重元台之

體伏惟慶慰恭以昭文相公世濟人傑道包聖微揭日月之高名會風雲於先帝奉綴衣之末命定策禁中暢英豪之偉謨立功天下上念大忠之力恩推異數之文加峻秩於天臺光元勲於王室傳聞成命舉慰具瞻某職總利權心遙材館阻從慶列第劇歡誠

代趙內閣賀昭文相公狀

伏以在復之來七日陽德其升建子之貫三微王心所慎恭惟某官先識經世元勲格天衣冠百工鈞冶萬彙

繫安危於天下感會兩朝輔左右之廷中周旋再紀通
臨慶序翕受純禧具瞻之石巖巖永堅民望相比之星
兩兩增耀台光某兼冒從聯總司漕節薦壽觴而莫及
跂相閣以逾勤

代李才元學士賀西京文相公狀

伏審就膺徽冊更尹別都尊府初開薦紳均抃恭惟某
官器包民極勲濟王塗蚤殄冠巢旋持宰柄履正德以
表庶位挾重計以重本朝蒐未紹之闕儀邁殫能事暢

無前之偉業重享成功措邦體於既平隱廟謨而弗有
踐崇高之極而自鈞出處之致歛康濟之大而樂就蕃
宣之勞亟換左符兼陞右揆列讓封而避寵順成命以
居留然而幅員蒼生成願晉公之再入坏冶舊物豈忘
周尹之具瞻行對宸綬復調台鼎

代賀何舍人狀

伏審宸綬疏渥法從登賢向聽朝僉預伸面賀旋承拜
命適偶戒行徒增忤于寸襟阻裁誠於尺牘竊以代訓

誥宣明之作真見文心惟文章雅正之才能體詔意膺
是妙選允歸宗工恭以某官識貫幾深學該鉅細早躋
諫垣之秘列亟踐禁廷之貴游丕變時文一至古道載
筆書萬代之法茲為儒榮持衡宰四海之平猶鬱時議
矧注錄之上笏即登庸之便塗行奉詔音驟光冊拜某
嚮緣同籍之分嘗被虛襟之容迭聞褒陞倍深茂悅

代賀韓舍人狀

伏審茂對恩書榮躋法從側聞褒擢陰切欣愉恭以某

官器資淳修業術精奧早逢文雅之會優陟秀廉之科
華要洊揚聲光愈綽方載言於法座俄給札於禁林有
文章溫厚之才能體詔意代誥令宣明之作遽當上心
行追三代之醇遠駕二京之右殫儒者之顯效置鄰哉
之近班

代賀安撫陳舍人狀

伏惟某官品格淳修才猷膚敏言經邦國之體學際天
人之交道簡宸襟地嚴諫署珍策重計施諸當世而可

行要職美官不由累日而自致出宣溫誥溥諭上仁行
入對于清光亟徑躋於嚴近順迎令序誕集純禧某別
乘庀司矧宿官之茲限南山興祝固介壽之莫前

代賀李刑部移襄州狀

右某伏審就蒙細劄移鎮巨藩伏惟慶慰恭以某官經
世偉才縉紳碩望露章懇郡方俞詔之褒優當軸須賢
行寵恩之陞擢伏望上為邦國精調燕興

代賀張待制移揚州狀

伏審膺圭符之寵寄易淮海之輿區肅東剛辰已班寬
詔俛惟陋壤獲邇大邦榮庇末暉喜踰常等恭以某官
才猷高亮風績宏長早會遇於聖辰久翱翔於禁職解
吳興之郡印尚仰褒書改廣陵之守麾復開督府露章
按罪方紹昔賢之風加秩賜金行光循吏之目某適膺
州榮阻叩賓閣從慶列以無階馳懦衷而第劇

代賀廣州王少卿狀

伏審茂對明緡就移巨屏躋奉常之少列兼文館之秘

聯蓋以國家慎重長人愛綏遠俗因推不次之命以付
非常之賢登庸出於此塗懽頌均乎衆口恭以某官直
清不倚莊重自居行高薦紳名記當宸雄文取重於時
論大雅追還於古風董淮服之輸將瞻神都之供億才
周數器勲濟本朝督府千兵暫臨南海之鎮溫書一札
行陟中台之階俛惟下僚久備屬吏側聞異數竊忭寸
襟藐如嬰兒驟奪慈母恭若疲馬止思故軒喜戀交情
名言非論

代賀湯都官狀

伏念自奪恩暉寢更月所門墻愈遠踐牒不時豈謂不
遺冗賤之蹤特賜丁寧之誨拜而伏讀藏以為榮旋聞
入奉明綰寵更巨屏庇廕之下喜忭兼常恭以知郡都
官秉節直清賦才雄健會龍飛之復旦被龜紫以光朝
出守之領使麾矧隆帝渥衣繡之過故里茲實儒榮超
伏非遙瞻依倍切

代賀正上亳州宋侍讀狀

恭以某官學際天淵名重纓襜早陪乙夜之覽允極丁
辰之榮翔步玉塗居勞侍從之事班條侯閫出詠中和
之詩順履慶辰具膺景福宅上台而秉軸諒在匪朝祝
南山而奉觴莫違為壽

代賀正上昭文相公狀

斗初建寅帝出乘震西京講物允重三元之朝東國著
經寶尊五始之月恭以某官山河間氣社稷宗臣扶重
計以尊朝廷秉直道以結人主位隆公衮勲濟王塗太

平之策畧行已濟至治畫一之歌繼作第守成規坐論
大猷首調元綽廟堂之上深暢於偉謀疏宸之間日傾
於正誼聊觀風於雅俗因均佚於陪京須五月之政成
復三篇之冊拜伏望順迎令序誕擁寵褫南山之石巖
巖鎮為民望泰階之星兩兩永耀台光某職列漕臺迹
遙相閣薦壽觴而進拜阻預後陳貢慶牘以浼尊曷涯
下悃

祠部集卷十七

欽定四庫全書

祠部集卷十八

宋 強至 撰

狀

代賀冬上諸官狀

寶典履長雲臺視朔復天陽於七日亞儀會於三朝恭
以某官洵直懋功融明迪哲發揮當世之務茲鬱於賢
謨綱紀列城之風聊分於使領順迎令序誕擁龐禔某
適限他司莫前為壽傾瞻林頌曷諭下情

鄰郡知州狀

一陽聿新萬寶伊始合陰陽之交讓步珠璧以聯暉恭
以某官才為吏師學際聖聞班條治屏聊鬱於遠謀鳴
玉嚴塗佇揚於華貫導迎令旦集受繁禧瞻禱所深名
言匪悉

代謝運使工部保舉狀

某自少也賤實今之愚學弗名家力徒稽古一竊科籍
久縻祿鍾間關四紀之餘忝冒數州之寄唯臨淮之陋

壤乃沿汴之安區自領一麾僅彌期歲事弊未革民瘼
尚留日虞官瘵以底吏責豈謂某官曲矜懦介特賜甄
揚掩其疏短之才謂可劇繁之使親形封奏上達冕旒
感積於中望踰於始昔者楚諺珍季布之諾不啻得金
魯經尊仲尼之褒有踰贈袞竊欣幸會迴越舊聞敢不
佩服攸箴周旋乃事天休雖至而不以為喜官局是專
而靡營其他永矢捐軀仰酬知己

代謝施待制狀

昨以他郡寓家使塗抵任子居虔命之署冷甚廣文之
官豈謂曲諒愚衷過垂恩惻俾沿臺牒往促漕舟皆緣
公為得遂私欲獲挈賤累盡歸巨庥此蓋伏遇某官盡
物以誠任仁於己永言感服曷究指名

代謝二司狀

某到郡累旬監州無狀簿書弗整管庫少嚴掣錦致傷
雖強學而安可血指為斷蓋不能之使然承攬轡之按
臨欲望風而引去不時斥罷盡出優憐知無不為力圖

拙者之效死而後已誓答仁人之恩近阻高明諒臻禧
福伏望順節自壽協時所瞻

代謝兩府狀

被恩至渥冒職如初俯伏拜嘉兢慙失措伏念某早緣
曲藝竊綴茂科逢辰寡資累日取進擢領漕權之重往
當河朔之雄方殫鄙才思稱繁使而所屬列郡非良長
人致狂寇之不咸嬰孤城而自守不能慮事而先撻徒
爾傾忠於已萌賴廟算之萬全破寇巢於一舉私心俟

欽定四庫全書

卷十八

黜恩典從寬止奪使麾尚叨守綬雖頻年易郡未始滿期而南服按刑僅諧累月豈圖明命復眷孤蹤就改外臺俾還舊物蓋使過者欲功之勉當失者知得之榮靖言忝塵厥有緣自此蓋伏遇某官代天敷化當軸均仁匠物謂無可捐器人容有不備卒令駑質仍玷龍光敢不究惡事權激昂志尚少圖拙者之效庶答大鈞之私

代到任謝兩府狀

右某比者就蒙細劄移領善邦望闕非遙假麾何幸竊

念某本由平進親遘盛期累日而取官資固無他術應
宿而居卽位誠玷茂恩而復頻易左符率遷喬木唯泗
封之故郡實淮服之會區曷稱衰遲輒當繁要此蓋伏
遇某官代天敷化與物終仁畀分外補之榮曲盡大鈞
之賜敢不周旋乃職黽勉在公永矢捐軀仰酬知己某
下情無盡感懼激切之至

代謝諸官狀

茲以短才猥當煩使藪然財賦之供億乘以簿書之冗

紛徒爾傾風未由奉記豈圖情照首貺音滕意在遠而
彌親禮由謙而益厚仰銜勤抑第切銘藏歆渥云初標
儀尚邈勉綏寢餽前對寵榮

代謝轉官狀

帝饗告成德音申諭泛均洪澤施及冗員被寵匪叨拜
嘉知愧伏念某本由曲藝冒進茂科早緣幕廷寢踐閨
籍止圖累日之效以致列星之聯豈謂禮訖總章慶重
列位或講求曠典之舊或侍從嚴祠之勞此而例遷固

匪虛授若茲忝據良自夤緣此蓋伏遇某官素勗霄期
致階榮漸卒令驚猥亦玷龍光敢不加慎操脩益思樹
立上酬天造次答已知捨是而他不知所措

代謝二司狀

露章易郡得請還朝獲遂私誠將違公庠怔惶承命喜
戀裝懷伏念某荏苒外麾徘徊末路力圖為政之效日
抱瘵官之虞重以迎侍安輿阻遙故里雖竭晨昏之奉
殊乖羞膳之宜然君父之命已行弗宜數改而人子之

心未盡因用上陳豈謂睿慈俯從愚欲此蓋伏遇某官
素推大惠曲軫孤蹤贊行終物之仁使就養親之便永
惟感幸曷究指名

代得替謝上司狀

術短事叢地卑郡要加庭闈之奉養有風土之乖殊弗
便旨甘遂形懇請願除便郡以就私誠露章方聞俞詔
隨下矧爾更書之代將違蔭宇之釀得免官瘵卒以理
去靖言所自厥有由然此蓋伏遇某官早借題評俯矜

樸直靡尤庶物之曠曲示秉容之優獲解守麾俯行鱸
之入覲回瞻恩館惕感涕之無從

代謝提刑狀

近以露章宸冕卜兆親瑩因緣盡室之還將就乘舟之
便為謀弗熟引慝固多值使旆之按行呼篙工而詰問
仍移牒命俾述事端雖勉開陳尚虞舉劾豈謂靡尤既
往之過特寢必行之文此蓋伏遇某官量極秉容仁推
再造念效官四紀粗守於謹廉使竊寵一麾獲全於榮

幸欲報知已敢辭捐軀

謝兩制狀

祇奉明綬就叨寵寄京畿近服邦漕重司併集茂恩驟
加庸品竊以為國領計須官得人餽輸中都不朘民而
厚上澄序庶位不簡賢而附權具足兼長乃名宜職苟
容竊位曷弭公言某效局無堪瘝官有素江淮易任曾
靡寧居金穀主謀悅迷舊習豈謂浩繁之委不遺孤冗
之蹤此蓋伏遇某官言味借優褒華引重振拂汙滯矜

憐介愚寢聞當扈之聰遽復外臺之命敢不周旋乃事
恪慎厥脩永矢捐軀仰酬知己

代謝王舍人狀

逖阻風猷寢更年所日為簿領之關掌坐致音書之闊
稀方切傾賢遽蒙下教感與抃會情鈞禮優恭以某官
素練善經洵揚撫仕沈毅有畧不廢壺歌之懽嘯聚自
潛已絕萑苻之警果凝顯烈驟陟榮班某處事弗精瘵
官是懼尚蒙寬假不汝瑕疵去德未遙佩恩良極

代謝許發運狀

某一竊科籍久縻祿鍾累日而取官資固微他術應宿
而居卽位誠玷茂恩向叨郡紱之榮越隸使臺之屬罄
殫拙效訖之最稱逮秩滿以還朝仍使麾而假守靖言
忝冒厥有階繇此蓋伏遇某官為容有先增價十倍卒
令駑獯亦被龍光敢不佩服攸箴周旋乃事庶幾一得
云補萬分永矢捐軀仰酬知己

代謝經過諸處官員狀

近沿臺牒獲道治封上謁賓除屢邁賢規之粹交謹宴
俎過蒙主禮之優還局而來息肩未暇復往推於詔獄
因曠奉於音滕尚賴寬明弗加疵咎伏惟敵災貫序福
履餐和諧歛寢遼傾瞻曷既益綏燕起前對褒陞

代謝王副樞答書狀

近者伏聞某官光膺徽冊叅掌繁機增天子得賢之稱
副大臣行道之實幅員億姓咸託於鈞陶藩翰下寮竊
形於距躍因傾愚悃上浼台光豈謂公輔量寬廟堂政

暇自忘絕禮回貺鈞函拜讀以還兢榮失據伏維緝熙
帝載翕受天祺恭以某官王佐偉才民靈先覺高文大
冊蚤冠於雋科華貫嚴途游揚於聖世備紓賢業自結
主知密侍清光益隆體貌禁局視草久屈將明之資樞
幄暢謀聊分宥密之寄行明緡之登進職上衮之凝嚴
副國倚毗協時瞻屬

代謝許州相公狀

頃在三川屢為吏第疲駑而自守微銖兩之足甄伏

蒙矜憐介愚終始振拂預郎垣而竊寵忝侯閭之亞麾
訖賴曲成敢云自致栽培之德休論報以無階樗散之
資復託蹤而得地出入材館貿遷歲簡辭藝荒蕪濫肩
下客之列禮遇優厚率荷上臺之仁會遷印於宰廷方
建麾於京輔首錄門下之賤俾綴仕階之榮露章上聞
俞命隨降弗由稽古之效遽有進身之基靖言載惟厥
有攸自此蓋伏遇某官大鈞播治煦律吹枯匠物謂無
可捐器人容有不備是令茂渥輒及鯁儒棠棣微生盡

沾雨露之澤鵲鶴翽品皆緣卵翼之恩永矢糜軀仰酬
知己

代謝中書狀

濫被恩俞出司憲職語能且薄荷責惟憂竊以國家惇
尚至仁哀矜庶獄治刑之吏或舞於深文抵罪之氓間
罹於密網因重按章之選俾澄濫罰之源宜得敏才以
當繁使伏念某肖靈非粹學古不優早從朝弁之華寢
冒書林之目以至分守符之寵寄備王府之末員罄竭鄙

才訖微善狀優游一郡思全懶放之懷董按列城本非
平素之望靖言塵玷厥有階繇此蓋伏遇某官翼亮天
工運平帝緯器人容有不備匠物謂無可捐坦然至公
施及無意敢不周旋乃事恪慎厥修誓殫一介之勤少
答大鈞之賜

代謝李兵部狀

此緣厚幸得備屬官向因愚悃之傾輒瀆使威之重豈
圖乘轉給之豐暇忘爵德之達尊俛顧下僚特頒諄誨

仰佩一謙之美第增三復之勤恭以某官元精所生盛德之後早躋纓紱之貴自結續疏之知總漕節之劇司方圖顯效復相門之遠躅行被茂恩

謝蔡學士狀

蠢冥亡狀汨沒於時向補獄官嘗備掾屬轅駒局促曾建議之弗明市狗悲號或賞音之間及洎冗曹之滿歲會卓馬之還朝無何孤蹤亦旅上國天銓待次殆困東方之飢酒正乏員遽叨北海之薦靖言駕猥曷稱甄揚

此蓋伏遇某官興勸官能助開公道不遺簪履之舊力
提管庫之微敢不佩服攸箴周旋乃事謹材六物寅守
於舊聞第課三年庶成於微效

謝范陽軍司理狀

官舍接疆日瞻高矩客車過郡時剽美聲恩清晤以未
涯遽珍題之為貺恭以某官才猷膚敏方格淳修一命
開榮尚淹於遠蹕上臺交薦行蹈於亨塗倍順節宣少
平頌願

代謝文相公答書狀

蚤以孤單素叨獎遇訖被大鈞之賜寢貳外麾之榮旋
去門牆漫逾歲月一身銜感因罄敘於惻惻兼幅瀆尊
懼自貽於罪戾豈謂王公之量曲惟犬馬之情弗爾擯
遺親形誨諭拜嘉至渥論幸無涯伏惟靜鎮大邦具膺
景福恭以某官天元間氣王佐偉才以忠誼結主知以
道德為己任畫一之歌既作休有成規太平之策略行
翕臻至治俄還宰印出剖使符幅員蒼生望晉公之再

入旦夕徵冊副周尹之具瞻

代謝兩憲狀

某天資闇昧，胄系寒微。早挾片文，晚塵一第。脫略名場之困，間關仕路之榮。旋貳方州，適居要地。緝當坐局，多所抗塵。間參決於簿書，訖無裨於課最。慙廉自信，卑瑣誰容。豈圖經世之才，方重按章之選。夙夜重寄，品裁庶官。隨器而任人，市骨而圖駿。以其外弗修於邊幅，內粗守於廉隅。諒其介愚，謂可甄拔。特邀露秦，上達遽旒。坦

然至公施及無意靖言忖度厥有階繇此蓋伏遇某官
樂育興懷兼容成德輕於慰薦錄此孱庸敢不持前所
存覲後有立糜軀以報知己難酬

代謝何龍圖狀

伏蒙特抗辟書俾從藩服匪才被獎早度其難勝成命
未行預虞於弗稱惟治朝之故事付帥府之要權得舉
賢材以備官屬眷乃題輿之請最居推轂之先贊行教
條關決政務講兵民之利疚考風俗之便宜當取經通

之流以光慰薦之首如某者曾從寒薄性得顯愚局若
轅駒因逮明之無所欣如蠖蟄第竊忭之為多伏遇某
官為木先容采葑下體將令駑猥亦玷龍光儻卵翼生
成獲繇於恩館則頂踵酬報不後於衆人

府推謝學士狀

自去京都亟來淮服馳心翹館之下回首長安之遙仰
企高風倍增勞臆恭以某官德宏業巨行潔文醇由妙
年而取甲科不累日而踐華貫早被溫書之召入登祕

館之遊贊劇治於神畿勢非久次暢辰猷於禁署議所
同歸願輔粹襟行光寵數俛惟瑣亞倍百他倫

謝李兵部狀

近以驟遠崇威懼遺孤迹愧向重知之地尚懷未滿之
心因貢牋函仰通几格繇誠計之迫遽致言詞之講張
謂塵將命之嚴必冒瀆尊之咎終朝自省悸魄難安曷
圖大漕之崇弗聞冗曹之細益恢全度曲究下情謂夫
以賤干貴者蓋有欲言由初及末者方能成物特寬罪

斥親賜教音事絕舊聞幸踰始望惕焉下拜藏以為榮
兼審順履時暄誕膺景福恭以某官蚤紓賢業自結主
知言施當世而可行名揭本朝而甚白連更重柄未嘗
坐席之溫方總外臺行被詔函之趣還台衡之舊柄光
史冊之新書庶俾孱庸訖歸延治

代謝二漕狀

承之于茲字人未幾官簿弗整民瘼尚畱與錦使裁雖
強學而安可血指為誓誠不能之使然聞覽轡之按臨

欲望風而引去不時警片盡出優憐究悉寸心誓彈拙
者之效周旋巨庇庶免瘵官之虞方遠使威第馳愚悃
恭以某官才兼數品名重本朝綱紀列城之風暫光主
寄發揮當世之務行暢賢圖伏望上為邦家精調寢饋
代謝舉陞陟狀

尸官下邑才微分寸之長被薦上臺恩甚丘山之重事
踰望表感劇愚衷伏念某孤平之蹤汨沒亡狀語能勿
齒於俗吏行已恐羞於古人一竊祿鍾偶逃於官曠再

汙縣紱復避於親嫌。鼎從淮服之。遇易宰江濱之陋。而
且歲穰相接。民訟幾希。鞭扑牒訴之罕。關懷賦租科斂
之易。為力顧何。治績足稱。褒章此蓋。伏遇某官興勸官
能助開公道。諒其懦介。謂可甄揚。特屈知人之明。猥形
躡等之舉。敢不周旋。乃職佩服。攸箴。永夫康軀。仰酬知
已。

謝知府少卿狀

長無寸才。寒有餘地。百里自效。職頗憚於不修。三天誤

知衆遂疑其可取近具版謁前從府趨瞻榮戟之甚嚴
覺筋骸之如束伏蒙甫寬苛禮為霽嚴顏損邦侯之達
尊加國士之優遇以至均惠公庖之品許陪燕俎之懽
千騎雍容下臨所舍十目駭愕相視為榮事信越於前
聞心第藏於厚賜下邑歸去尚戀卿雲之濃終朝度思
益加恩地之重恭以某官稟氣間傑為時老成朝廷渴
賢方念元龜之舊廊廟虛位佇增顯爵之光孤生咸休
四海僉屬

謝通判國博狀

某託庇歲餘發蹤門下散木成器繫公輸之先容駕馭
為良由伯樂之回首近白吏事往趨恩閔方守閣之通
名已倒屣而垂接斂板長揖為降階墀之尊虛襟相容
不知州縣之賤以至燕觴延勞騶御在臨泥塗生光僚
友改觀守在民社未幾告還瞻言軒牆猶有餘戀伏望
協班寬詔坐擁繁禧恭以通判國博器完道醇性潔文
妙雍容倖乘之任豈曰盡才頡頏書林之遊此其宜職

伏望為國自壽以時考祥

謝越州知府待制狀

蚤聽諸公之諭竊親盛德之光位貌間殊情禮疎絕怵
自進之無路第仰高之有年遽被上臺之符俾論會府
之秀雖彈愚效何裨勸駕之勤比訖事經方適拜塵之
願而大賢不自貴重一介亦加采収以至燕俎將恩錢
壺申貺退銘盛遇增劇丹棕伏惟訟鋸盡空道環天粹
恭以某官器函剛實才貫機深允蹈古人之直清喜言

當世之利疚旋躋延閣之祕自結嚴宸之知東南請麾
已諧均佚之志旦夕被召亟對登庸之休四海共依孤
生非佞

謝楊直講狀

近並諸君謬程多士曾是辭才之短介於季孟之間而
甘辛好殊臧否鋒起人執一見誰將適從實繫定鑒
之精與決羣言之惑卒多被彥之在選獲逌有司之弗
明終朝度思受賜深矣復緣賤子之跡嘗出先公之門掩

其頑蒙陰有憐獎逮單車之亟引溯翹館以增勞伏惟
贊行寬條翕受純福恭以某官薦紳碩望名世偉才學
造聖賢之微文經邦國之要貳東南之巨屏猶鬱羣瞻
陟左右之嚴塗乃云宜職伏望為國自壽副時所傾

謝陳秀才狀

發詔羅俊命卿辨才伏審一摠妙文旋中翼等遠跡此
始私心竊驩首貼長牋尤識厚誼陳君即先輩氣得秀
粹學探本原諒竊鍾祿之榮勉從貢部之式華歲方盛

致身其時青雲在前舉足可到永言欽頌曷罄懽愉

回劉侍郎生日詩狀

五十富貴偶同治越之年八千春秋難辱借秦之諭珠璣可玩瓊玖是慚空積感懷莫知報禮

謝富丞相狀

比者祇被恩書與持計節寵幾于冒分失其安伏念某偶席世資罔通時用介愚既定於所稟矯揉雖勞而莫移矧策足於冗塗固絕心於要路向會高明之當國一

隨長短以取人緣是孤孱亦叨獎拔承財閭之官乏何
所建明佐神甸之治經終然暗拙懇求外補止覬小麾
曷圖造物之仁弗顧假人之議遽以煩使屬之短才既
假漕臺之劇權又分淮服之近地無桂玉之憂足以致
舉家之溫飽有海陸之產足以奉偏親之旨甘實私懷
之便安第官責之深重按列城之吏狀要在澄清籠一
道之地財抑資幹濟當竭愚慮以酬誤恩載惟單跡之
生成率自大鈞之終始即具舟楫益遙門牆敘感臆以

無從企台光而增戀恭惟某官器包民極勲濟王塗挾
重計以尊本朝履正德以儀庶位三辰以軌百化其凝
公路倚平暢偉謀於當世親聞棄養纏巨痛於終天愈
隆注意之私屢降奪情之詔雖力祈終制靡循方進之
故常而久鬱其瞻深跂晉公之再入伏望節哀順變視
履考祥上副廟朝之休下平海寓之願

謝賜酒食狀

僕馬瘠勞暫遂寧居之適酒肴豐旨兼蒙飫賜之加載

感良深諭言匪悉

謝館燕狀

竊冒使華肅將君命屬征驂之稅鞅即候館以肆筵祗服恩勤第增感戢

謝合食酒果狀

邦家修睦慶歲籥之履端肴核優賓參壺漿而申貺仰承嘉惠增戢愚衷

謝春盤幡勝狀

歲功適起春物滋榮製妙飛幡動縷花於剪綵珍聚多
品錯絲菜於雕盤併此拜嘉惕然卒感

謝生餽狀

車馬少休方諧定館餽牽並賜迴越投餐匪頒之禮既
優荷戢之懷良劇

謝射弓御筵狀

燕儀示惠過蒙折俎之私射禮序賓曾乏主皮之善其
為媿幸無諭感銘

謝餞筵狀

輕輶載飭將事于征嘉豆旅陳遽叨式宴良厚使殮之
眷特加祖軼之勤祇佩弗忘敷論罔既

燕京謝酒果狀

遠駕單車甫經別甸特念行人之至重煩使者之臨均
沾玉笋之清醪兼雜秀林之珍實仰承優貺增戢鄙懷
謝兩制狀

謬被恩綬出提憲局才輕責重寵至憂深竊惟庶獄之

原動繫生民之命雖詔條所約深慎於吏文而州縣之間或違於上意因精使者之選以董欽哉之刑必得周才乃名宜職竊念某職非經遠品不及中襲鉛槧之遺芬粗求寸效究簡書之深意都昧舊聞就領僻官尚虞隳職矧在淮州之劇尤稱犴獄之繁此而按章誠曰假寵靖循忝冒厥有階緣此蓋伏遇某官言味借優集華引重振拂汗滯矜憐介愚寔聞當宸之聰俾預外臺之寄敢不持存平允考察濫寃永矢糜軀上酬知己

上李刑部狀

右某頃在親喪嘗經治部名屢達於將命遇迴殊於衆人旋承卓馬之朝入覲蒼龍之闕俛惟賤迹時旅於上京適會輜軒遠使於絕域第傾德宇阻叩賓筵賴幸會之猶然續恩暉而有所周旋侯幕方備於下僚密邇遠麾復為於屬吏愧營職之亡狀致貢書之不時仰跂標儀坐勞悰臆恭以某官夙鍾間氣親邁熙辰秉忠諒之一心出誠明之正性固合往宅元輔陶成太和本朝以

漕權之艱淮服為最兵興調度之供億地賦詔求之浩
穰庸資兼才以領大計然外臺分寄誠鬱於具瞻矧中
宸須賢行膺於爰立伏望為國自重以時納休

上知蘇州蔣密諫狀

右某近修板謁獲叩坐隅伏蒙忘位貌之霄泥錫燕私
於樽俎間沾豐品申貺名醪揆恩禮之踰常決肌骸而
盈感奔馳吏役邈矣一涯契濶台光倏焉累日愧營職
之亡狀致貢書之不時伏惟鎮撫善藩綏寧泰宇恭以

知府密學諫議夙鍾間氣親邁熙辰東忠諒之一心出
誠明之正性優游訟樹密邇恭桑圭衮儻來靡嬰於素
志江山有助不廢於清吟伏望為國自重以時納休

代上李度支狀

向擁州旗曠馳書舍伏惟贊司邦計妙順生經恭以某
官親會熙朝游揚美任佐大農之調度方委於周才邇
中宸之聰聞行歸於劇任

代上呂狀元舍人狀

伏審茂對恩書榮躋法從伏惟慶慰恭以其官業術精
興方格淳修學足以挹軻雄之源行足以蹈淵濶之軌
親逢文雅之會優冠秀康之科華要海揚聲光愈綽方
載言於宸扆俄給札於禁林有文章溫厚之才能體詔
意代誥令坦明之作遽當上心佇見追還三代之醇遠
駕二京之右少見儒效即歸宰司某頃吏邑封嘗棲蔭
宇側聞新命增牀寸襟

代上范資政狀

伏自某官就奉制音往觀藩政門牆愈遠慮違冗賤之蹤賤牒不時懼凜高明之聽伏惟靜班寬詔誕擁純禧恭以某官王佐偉才民靈先覺忠言坐斷乎國論大筆追還於古風領樞廷之弼謨專將聞之節制備紆賢業獨映朝端旋陞祕殿之華益重嚴宸之眷幅員億姓已躋富壽之區藩屏一方聊布中和之治行圖舊德還宅元台曾是懦微素叨知獎特矜孤進之自力畢大鈞之仁事雖休於命違恩固踰於衆遇更繁延造以託生成

上永興路監司狀

叨從師幕將預戎機才無一長顏有餘愧其其少也賤
乃今之愚治曲學而不根經遠猷而恐泥他技俱短獨
潛圖史之精自知甚明僅給簿書之務若建都之舊地
重開府之盛游主人仁賢僚友俊茂應抗章之僻置往
廁其間須主畫之該詳密裨於內笑談足奉於多暇賤
檄皆如其欲言縱橫智謀出入方畧若此之比率非所
能尚繫官局之居適託使臺之庇致孤生之冒選良本

為容昧素術於從軍願前承教據依有所欣幸兼常

代上判府龍圖狀

戴政小邦瞻風上笏屬秋商之貫序仰福履之餐和恭
以其官經世偉才搢紳碩望忠言坐斷乎國論大雅追
還於古風中外游揚明哲一致迅躋內閣之貴益重嚴
宸之知京邑四方之表儀翕騰於尹政宰廷百辟之師
帥當被於朝僉咫尺聰聞旦夕再拜

代上催綱王太博狀

右某向嬰藩守阻奉郵音仰計水行妙熙谷養恭以某
官稟氣間傑為時聞人掌禮局之儀深明於典故促漕
臺之運方藉於幹能行疇茂庸驟陟華貫伏望上為宗
社精調宴興

代上通判陳太博狀

右某自遠風符游更年崙川壤攸阻緘滕幾稀伏惟贊
行教條翕受禧福恭以某官量函夷雅學際本元侯閭
亞麾尚淹於遠蹠相門襲慶當繼於先芬伏望上為邦

朝精調寢餽

代上楚州監酒洪推官狀

右某啓言念日傾高誼斗曠幽緘逖料燕寧妙符生理
恭以某官藝文精奧方格淳修坦坦榮途固宜於濶步
區區利局誠鬱於遠途佇善課之告成即寵恩之躋等
更祈珍嗇少慰顒瞻

代上運使李刑部回衙問候狀

右某伏審出按屬城近旋崇旆仰惟吉履俯萃釅休恭

以某官親邁聖辰備紆賢業登車攬轡已澄敘於官聯
輓粟飛芻復羨盈於邦計行旌幹濟驟陟凝嚴伏望上
為闕廷精調寢饋

代上知郡郎中狀

右某近者屢布音函繼紆誨績屬餘寒之未殄諒冲履
之惟休恭以某官方格淳修政能通敏守麾頻易率揚
循吏之稱時議翕歸尚起潛郎之嘆佇凝顯績行被茂
恩瞻奉尚遙傾祈倍切


上知郡都官狀

右某自去公庠鎮縻吏役日尸鞭扑之囂冗坐致音滕
之闊稀伏惟入對王休備摠賢蘊神觀靜復天和舉臻
恭以某官迪氣純全賦才肅給守麾滿歲方格上聰之
聞使節宣風行膺外計之委俛惟孱懦永托甄題伏惟
上為邦家精調寢饋

代上府推學士狀

望闕雖邇瞻風甚勞伏惟視治多餘練神增爽恭以某

官量函夷雅識貫幾深親奉盛期獨膺華貫書林擢職
方贊畫於王畿法從須賢行拜嘉於宸陞



祠部集卷十八

欽定四庫全書

集部

祠部集卷二十九至
三十一

詳校官庶吉士臣朱理

檢討臣何思鈞覆勘

總校官編修臣朱鈐

校對官編修臣高棫生

謄錄監生臣朱一鳴

欽定四庫全書

祠部集卷十九

宋 強至 撰

狀

代上施待制狀

右某自督漕舟鎮繁使部居靡定所日無少閒職是音
滕之缺然曠諮德履之安否恭以某官稟氣間傑為時
聞人由妙年而取甲科不累日而都顯位外臺重使誠
曰藉才之司內閣詞臣決非久次之地行膺迅召亟踐

元台顧惟孱微有所棲倚

代上潤州知郡曹殿丞狀

右某近者伏遇某官駕言于藩道出茲土輒緣門下之
舊履獲坐隅之親方敘感悰遽零別涕惟兩轡之稅駕
聳雅俗以瞻風仍審剛辰已開尊府宿官茲限馳賀無
階恭以某官職貫幾深量函剛實雄文取重于時論大
雅追還于古風圭衮儻來靡嬰于素志江山有助不廢
于清吟而况先一州乃大用之基為三公繇此塗而出

行甄治狀入對王休列職近嚴副時傾矚俛惟辱懦最
辱獎題金頌兼常文陳匪悉

代上本州知郡虞部狀

右某自除近屏久偃故廬輒緣恭梓之由屢叩訟棠之
下備蒙優顧陰激懦衷為郡事叢貢書禮曠仰惟坐鎮
俯順生經恭以某官親邁熙朝游揚臚仕紫垣應宿早
厯于清郎秀野班春聊蘇于雅俗行膺宸選少慰人言
伏望上為國家精調寢餽

代上致政相公狀

自領守麾日棲釣庇仰惟吉履俯萃醴休恭以某官道著將明量函方重出應千齡之旦來翊兩朝之功天下既安已休于廟畧宸衷得請遽致于官榮

代上新知南京歐陽龍圖狀

某士鄉近器儒世緒風頌繇天幸之然獲紹賢科之後輒階素分嘗觀清塵旋緣位貌之殊邈有霄泥之隔自視兄外不敢貢書而瀆尊日聞軒翔徒爾望風而竊抃

伏審祇承恩詔出尹留都某適督漕舟矧往來之皆道
復欣里閭將鎮撫之焉依榮幸兼常企瞻倍切恭以某
官際天蘊識名世標才中外游揚明哲一致主盟吾道
於變文章之淳昌言當時幾臻風俗之厚尚緩台衡之
拜聊司宮鑰之嚴然父母一邦不足充天下之望而領
袖百辟行以副上心之傾

代上柳侍郎狀

叨紆守紱獲適侯封如憐洪河日所蒙潤不遠數舍缺

然貢音伏惟鎮撫雄藩綏寧泰宇恭以某官早紆賢業
親會聖辰挺忠諒之一心出誠明之正性華要之選期
翔已周訟樹班條寧容於蒲歲公槐正位行在於匪朝

代上錢內翰狀

徘徊未路荏苒外麾日為吏事之勞分絕朝遊之齒自
視冗散罔敢片言之瀆尊宜圖高明遽加餘論之垂飾
諒其愚介謂可甄揚遐佩恩暉陰盈感悚恭以某官忠
諒許國文章世家親逢聖期獨膺賢選究國體而指人

事已極著篇之奇潤化神而輔帝猷佇觀行事之效矧
禁林之上笏即台衮之便途匪朝登庸為世休福

代上昭文相公狀

適抵官局遐企台光去國非遙盡出大鈞之賜貢書差
緩重干上衮之威伏惟變調氤氲翕受禧福恭以某官
際天蘊識名世標賢以文章取甲科以忠誼結明主向
專特渥之制力底冠巢之平衣冠百工大大臣之能事
富庶四海見真相之偉才

代上潤州曹殿丞狀

奔馳吏部密邇侯封間輒貢書而瀆尊遽蒙記室之選
教拜而伏讀藏以為榮伏惟鎮撫善藩綏寧泰宇恭以
知郡殿丞夙鐘間氣親邁熙辰父母一州不足充天下
之望旦夕中詔行以副上心之傾徇翔顯途暉映當世
俛惟孱懦鎮託甄題感臆所懷名言匪悉

代上王承旨狀

一逸牆宇尋蒞方州有簿領之裝懷寢成冗瑣顧音滕

之市間坐致濶稀伏惟某官業術精與方格淳修學足以挹軻雄之源行足以蹈淵濶之軌親逢文雅之會優冠秀庶之科華要海揚聲光以綽視草玉堂之署密奉辰猷調元金鉉之司行被神化

代上交代郎中狀

伏審入奉宸緡出紆守紱夫何榮幸輒預交承善政缺然靡尤於既往高賢繼者當俟於更張方覩除書之來因馳賀牘之晚恭以某官學際聖間才為吏師泗當淮

服之衝佇凝於治狀歲上甘泉之課首被於恩章咨覲
非遼欣瞻倍切

代上畱守龍圖狀

就蒙恩詔移領邑章往來江淮顧舊學之幾廢委寄民
社於有政而曷施尚幸單蹤早棲大庇高明有造諒舊
物之不移鎮統焉依幸孤生之有託行瞻大旆增忭寸
襟

代上柳龍圖狀

把麾侯服遠跡賓除徒然德誼之傾缺爾牋滕之奉仰
惟純履舉萃醴休恭以某官盛業熙邦雄文經世席兩
朝之宸眷夙著耆明踐內閣之官榮行聞登用

代上潤州曹國博狀

猥瑣無堪蠢頑惟舊乘以吏曹之冗缺然牋牒之修伏
蒙自損達尊時占勤教而復諒其孤進之自絕有先容
之為府矜滯蹤力發薦口常自策於驚猥庶託稱於獎
提伏惟鎮撫善邦綏安泰宇恭以某官直清不倚莊重

自居才為吏師名重物論東南之屏聊布於寬條左右
之廷渴聞於正議行承溫檢驟陟顯塗

代上南京歐陽龍圖狀

某早會石文寢階下列出繇寒士之目樂聞大夫之賢
若夫作世之宗師立朝有風采逖聽輿論率歸巨公如
揭日月而行孰不仰望居為秦楚之隔未嘗進趨比者
伏遇就奉詔音出觀藩政夫何恭梓之里獲被詒棠之
風敢緣幸會之機以紆平素之願恭以某官德函剛實

識貫幾深道簡上心聲聞天下而自振藻書殿代言禁
廷文章大醇坐復古道制作一出立為人模固宜暢鈞
軸之弼謀廣幅員之休祉尚淹符冊屈布寬條然祕殿
侍臣寧久外補而上台貴仕行被外庸副國倚毗協時
瞻矚

代上知郡郎中狀

比者知郡郎中得請宸疏奉安親兆暫還僊墅兼侍壽
輿自使旆之戒塗即秋霖之綿日稔獲晨昏之奉諒忘

跋履之勞仰料冲頤翕臻純祉恭以某官體凝簡重氣
迪醇淳親逢復旦之期寢踐列星之位晝繡旋里茲極
於時榮昔襦興誼方繫於風治

代上端公狀

近者伏值某官臨督通漕留止屬封俛惟冗遭適備下
吏獲委草茅之賤屢趨旌祭之嚴使車南轅倏茲累月
官簿盈案曾無暇時第馳聽於門牆廣布誠於牋牒伏
惟坐籌大計舉萃麗褫恭以某官道具粹醇器函剛實

早紆賢業自結主知總金穀而瞻中都久茂風績秉鈞
衡而調大化遲膺冊書眷言單璫之蹤訖望埏容之賜
代上宋內翰歐陽龍圖狀

祇奉臺移往提河役奔馳俗狀畱止治封伏蒙忘宗工
之顯嚴顧郎曹之散冗外厨五鼎靡獨享於豐珍清酒
百壺並曲加於撫勞比需訖事亟往拜嘉一瞻體貌之
尊少叙腹心之感遽被上官之命俾從他郡之行鄙願
頓違愚衷第切伏惟坐班風教翕萃福禧恭以某官上

天元精清廟偉器高文經世亮節在廷鉤姬孔之聖徽
發為事業輔勲華之主德動罄謀謨暫淹公輔之才出
鎮藩垣之寄行膺徽冊登冠中階益隆宸扆之知庶協
朝紳之議

代上文相公狀

伏審還印宰廷領麾藩服肅使旌而就道露公冕以觀
風仍即便時已開尊府恭惟某官器涵剛實才貫幾深
出對休辰進更顯仕密蘊廟堂之略往分邊閫之憂旋

總計於漕臺亟墮華於延閣殿坤維之劇部尋被更書
掌樞幄之繁機未嘗坐席遽膺宸詔改貳台司值強敵
之不咸嬰孤城而自守獨形忠憤請殄姦妖果廟算之
萬全破寇巢於一舉晉公平蔡宜位絕於官師傳說賚
商以道開於人主登庸賢俊振拔滯淹拒塞幸門追講
闕典少見大臣之能事弗殫真相之偉才懇瀝讓封願
還幾政雖斷章趣戒重違金石之誠而俞命隨頒聊付
圭符之寄加尊八座均逸陪京諒五月之政成復三篇

之冊拜

代上兩轉運狀

寄身節下日棲蔭宇之濃董役河濱斗曠音函之奉抗
塵客而亡狀企使範以增勞伏惟主計多餘嗇神增裕
恭以某官郎垣碩德王國偉才親遺光華之辰備伸久
大之業綢繆利柄矧風績之茂焉趨走詔音行恩章之
嘉止

代上張端明狀

昨者沿牒上臺假塗大府企門牆而竊抃將卜嚴趨貢
牋牒以瀆尊預紆下悃伏惟被細書之溫厚移巨屏於
東南阻叩坐隅徒瞻廷表豈謂廟堂之量廣不遺塵土
之跡疎首占鈞玉仍頒釋部拜嘉甚渥撫已增榮伏以
某官方格淳修業術精奧高文大策蚤踐於賢科至論
昌言有裨於聖世旋持荷橐道陟嚴塗司內命於禁扃
方殫儒效暢偉謀於計府已集邦須輟祕殿之華班分
左符之重寄民瞻滋切上意方傾遽邁親闈之悲差池

公衆之拜然萬鍾及養足少抑於哀推儻細札奪情庶
兩全於忠孝

上徐都官狀

昨調天銓始官淮服風波起乎萬狀初驚官路之艱歷
上萃于一身因識掾曹之辱若乃接人情之至術治獄
事之大方侗然而愚罔所知嚮備蒙教最僅保傾危以
至陰沸滯蹤力開薦口皆重恩之難報第孤抱之知歸
去德彌年瞻風惟日悵簿書之犯慮汨沒無休顧牋牒

之問安缺疎不講分從譴怒自爾擯遺何長者優容之
深出微生忖度之外兩頒勤誨愈篤曩懷固始望之大
踰加積憂之頓釋仍審協宣寬詔增裕冲襟恭以某官
莊重粹溫剛明精敏闕掌郡治尚鬱高賢之資鉤深聖
微行躋太史之局其為慶幸曷盡敷陳

上陳主客狀

某承學不優宿官亡狀當淮州之雜會決囹圄之重繫
慚磔鼠之微能訖無智慮挾籠狙之小數間得事情其

如鄙訥少文羈孤寡援第慙廉而自守雖顛躓以誰憐
散木之出溝中匠無顧者棄芻之委道上人皆踐之尚
繫吏局之卑正隸使旌之下時於寒素弗忍擯遺坦然
開至公之懷舉以堪一邑之寄發蹤自始論感無涯邁
外計之需才遽嚴麾之易地心傾恩館戀極疲軒伏惟
順泛齋船具綏泰宇恭以某官器能膚敏風業宏長親
對休辰游揚顯仕按簡書之輕重方及暮年董金穀之
輸將驟移南服矧時論以剛明推重主上以忠誼知名

行間被優詔於塗中趣還轅於闕下亟更大任少副羣
言

代上揚州張學士狀

千騎過郊向諧瞻覲貳車監郡鎮若將迎間叅決於簿
書因寢稽於牋牒伏審肇開尊府肅布寬條密接化封
日聞治狀歆炎貫序燕寢滄和恭以某官學造聖微識
探經輿對休辰而逢吉躋顯仕以揚光預計財闡茂經
畫宣風漕節多所澄清久簡帝宸游紆守絳露章按罪

已著於威明增秩疏恩行膺於甄擢

代上省主并二漕狀

庇迹崇麾尸官再歲五能俱短固乏於寸長一个無他
或矜於小善被文移於計府鬻籍入之民家奔走道塗
淹徊日月覬成拙效罄竭微勞以訖事經敢希賞格偶
獲免於瘵曠幸不辜於使令報知己之心雖堅於金石
助公家之利何啻於涓埃遷次一官茲誠始望之外挈
提孤跡更賴剡章之明恭以某官道廣進人恩隆成物

開推轂之言味多所揄揚發踰袞之褒華願加慰薦庶
令驚猥足企龍光苟無似之叨榮則有能之知勸深懷
厚德第劇愚誠

上廣德知軍袁郎中狀

頃以諸生最蒙優遇居常策勵報稱獎憐再舉登科尋
喪慈母一官來泗遂為冗曹跡久去門牆之嚴名不徹左
右之聽謂由疏賤從爾擯遺企軍壘之剖符自淮州而
假道首傳勤誨愈篤曩恩損齒爵之達尊屢紆騶御顧

州縣之勞職俾侍坐隅而復垂憫滯蹠許開薦口始終
被惠感服無涯恭以某官才貫幾深器涵剛實守麾最
樂聊布於寬條公袞儻來靡闕於素志行旌善狀亟陟
嚴塗

上代許州相公狀

伏審繼列讓封願還幾政奉宸綬而得請露公冕以宣
風因瀝愚誠仰陳台睠況朝廷有達尊之訓廟堂有絕
禮之嚴宜料厚慈兼持謙德親命記室回貺鈞函拜伏

究觀驚惶失據恭以某官天民先覺王佐偉才出對休
辰進揚顯仕更弼護於兩府聳烈業於本朝寢簡上心
登冠羣后拔賢俊以開治路抑權豪以閉倖門佐閭典
之未行殫豐功於已試懇辭上袞出鎮巨邦矧巖石具
瞻尚思於鈞造而陝郊處外行被於詔還

代上龐昭文狀

自塵下士之列蚤出大賢之門旋庇台光寢陞卽位悉
心圖報思樹立以無階造物誤恩亟甄提於不次擢自

計廷之末董茲漕節之繁去國非遥誠荷洪鈞之賜貢
書差緩懼干上衮之威伏惟坐論猷為力宣利澤神明
所相福祚載蕃恭以某官業履崇高智謀光大抱廟堂
之偉器挺金石之純誠出對休辰進揚顯仕更弼謨於
兩府聳風烈於本朝獨深真主之知首宅元台之序圖
講至治薰陶太和百度清明羣生舒暢稷禹視已儀刑
列辟之先堯舜吾君拱揖法宮之上躋宗工之極致光
信史之直書曾是冗微最叨獎遇庶成毫髮之效訖稱

埏鎔之仁

代工柳龍圖狀

鼎緣崇旆戾止陋邦適佐郡符幸通謁舍不遺門下之
舊屢獲坐隅之親造使車之西還倏彌年所顧官簿之
堆積缺貢德音伏惟坐而寬條誕膺純祉恭以某官冲
襟有裕亮節不回明哲于躬具存大雅之美典刑在事
允藉老成之資獨臨端朝自結真主履官階於延閣冠
鄉列於禮司藩服一麾暫勞於王事詔音三節行簡於

帝心

代上李兵部狀

比者進承恩詔往領計臺自江而東厥賦彌夥矧惟封
節隣小醜之繹騷宜有經謀贍一方之支度豈圖繁使
遽假菲才獲幸於天借棲有地恭以某官器函剛實識
貫幾深早邀聰哲之知出總東南之漕刻去宿弊樹成
親規董淮海之輸將適凝風績副京師之供億行被褒
章紀美王常增光相閔

代上安撫舍人狀

伏審宣命列邦著聲近署揭使旌而就道聳侯服以傾
風拜德有期實天與幸恭以某官器函夷雅道具粹醇
言施當世而可行學質古人而不謬帝念東南之郡民
罹水旱之年屈邇臣侍從之華奉承明詔將天子惠綏
之意慰撫羣元某適守陋藩行瞻上笏永言企抃曷究
文陳

代上張學士狀

早繇寒士之目嘗出大賢之門尋冒俊科寢陞閨籍第
銜恩而有素怵論報以無階而且跡久去師牆之嚴名
不徹閭人之聽謂由疎簡從爾擯遺會督府之剖符自
陋邦而假道獲瞻威采愈篤顧憐何天幸之復然續恩
暉而有所外臺轉給方渴於英才明詔褒優亟還於要
職俛惟官次得隸使麾新命傳聞寸襟竊忤恭以某官
道先民覺學貫聖微夙躋朝弁之華久列書林之選主
知物論率高恬退之風賢業忠護行罄將明之效

代上揚州知府學士狀

伏念向從遠宦方復故棲夫何恭梓之邦獲被坐棠之
化已浮單舸將次近封拜德有涯實天與幸恭以某官
才謀高亮器識宏通早陞朝弁之華旋被書林之選郎
垣久次素高恬退之風帝詔趣歸行懋褒加之典餘須
瞻伏以訖悃悃

代上致政杜相公狀

南郡下僚西州末介被臺符而奔命曾靡寧居遡材館

以馳心第勞景仰曠修牋牒上瀆燕興恭以某官河嶽
上靈瑚璉茂器懿妙文而表世端亮節以在廷股肱兩
朝體貌一德歷豐功於已試避要路而弗居珍策熙邦
備見將明之效安車就第益全恬退之風素里揮金聊
追於逸致青編載筆增美於臺書

代上江寧府郎待制狀

冒職云初究心乃事仰止燕言之美缺然牋牒之修伏
惟吉壤觀風冲襟毓粹恭以某官識深經奧學造聖微

言施當世而可行道質古人而不謬厭司內閣之待樂
駕兩轡之遊圭衮儻來靡嬰於素志江山有助不廢於
清吟行被詔歸驟光柄任

上南京通判都官狀

頃在鄉閭嘗依師席訖無優學止綴下科遂參冗吏之
遊誠玷先生之誨當淮州之雜會決犴獄之重繁跡久
去門牆之嚴書不徹左右之聽謂由疏賤從爾擯遺近
偶北轅輒嘗進謁伏蒙忘其位貌之隔視若子姓之親

曲以顧存優于獎最旋違盛德增企寸心恭以某官學
鉤聖微聲重時論闕決名都之治聊以康民延登祕館
之華乃為宜職

代上田省主狀

近緣臺檄往督漕舟止神甸之近郊無由越進企恩闕
於一舍第效臺趨因紆瞻嚮之懷仰瀆高明之聽願登
翹館釋戀疲軒遽錫公移俯從愚悃逮通名於謁舍旋
拜德於賓除伏蒙損計相之達尊顧郎官之冗列虛襟

引納更僕優延省已毫毛之輕銜恩山嶽之重自還吏
局增想台儀伏惟坐籌邦計之繁翕受天和之粹恭以
某官民靈先學王佐偉才親遭重熙之辰蚤躋特達之
選兼禁局之華序領財府之劇謀富國康民皆出著篇
之舊經邦致主行登秉軸之崇

代上青州文相公狀

伏審出臨治屏已整齊艦鏡鼓沸川允極行暉之盛壺
獎溢路前知輿望之濃矧在冗僚最叨巨造淮濡雅守

獲在於便塗道左瞻風庶伸於下拜日需台旆竊忤恩襟

代上判監檢討王學士狀

自阻緒言旋嬰細務第瞻書殿之貴差緩公函之修方
春肇和所履綏福恭以某官術業經遠文章世家親逢
聖辰早暢賢蘊譌文缺簡叅藏寶之刊修善教素風兼
成均之早育少殫儒效行被帝咨亟踐嚴塗繼陞顯仕
伏望為國自籌以時考祥

代上王承旨狀

枵淺之資冥頑惟舊頃緣吏役嘗拜台儀鈞造特深有
容一介之技天幸何薄不出大賢之門殆遠貳於州符
復累從於臺檄奔命弗暇貢音絕疎尚繫全度之寬靡
誅苛禮之失伏惟總司內命誕萃繁禧恭以某官識宇
閎通才謨高亮蚤甲雋科之選亟更書殿之游游歷班
榮密謀邦體以至提綱憲府作尹天京旋出殿於邊藩
益茂凝於風績甘棠勿翦方惠政之化民零雨既濛既

介圭之脩觀上心宿注時論食歸金鼎調元行顯持於
宰柄玉堂視草聊首暢於宸猷

上裁造太傅狀

右某自遠師牆鎮膺吏局日臨鞭扑之囂冗坐致音騰
之缺踈仰跂恩暉第盈感戀顧歎炎之在序諒燕起之
惟時恭以某官識貫幾深德孟剛實出納闕慮誠屈高
賢之資校讎需才行歸太史之局俛惟孱陋永托甄題
伏望上為邦朝精調寢餽

代上省主張端明狀

右某向奉朝參嘗修板謁世蒙授進之賜跡免瀆尊之
嫌濶絕台光倏焉累月棲遲旅次邈矣一涯曠敘暄涼
仰諮寢味恭以某官夙鍾間氣親遇熙辰秉忠諒之一
心出誠明之正性入尹京邑進居樞廷允極將明之資
以基太平之業然而國朝重選主計為艱金穀大司得
才則濟意先財府之充給即議冊書之寵加匪朝登庸
爲世休福伏望上爲邦社精調宴興

欽定四庫全書

和昌
卷十九

祠部集卷十九